

Departamento di Asunto Social y Bureau Sostenemi

‘Codigo di Siguridad ta importante si tin preocupacion pa menor’



ORANJESTAD – Ayera Departamento di Asunto Social a ofrece un conferencia di prensa na medio-nan local pa actualisa tocante e Crisis Plan Social na Aruba y introduccion di un ‘Codigo di Siguridad’ hunto cu Bureau Sostenemi.

Glenda Hernandez, director di Departamento di Asunto Social, a splica cu cuater sector di departamento gubernamental y tambe e instancianan social di e sector aki ta trahando hopi duro pa sigui ehecuta e Crisis Plan Social.

El a bisa cu na e momentonan aki nan ta ocupa cu e di dos reporte di e 34 proyecto den e cuater sector, cu ta proyectonan di casa cuna, Imeldahof y varios proyecto cu mester ta monitor. E di dos reportaje aki ta e final pa wak con ta ehecuta e diferente proyectonan.

Di mesun manera, Hernandez a comenta cu tambe nan ta ocupa cu e Ordenanza Nacional (Landsverordening) pa extende e periodo di ehecucion di e Crisis Plan Social pa aña 2020 y 2021.

Hernandez a recorda cu e plan aki tin dos meta, ‘pa cada mucha na Aruba nos kier logra pa nan ta sigur’ y te ainda e situacion no ta asina.

El a expresa cu nan tin cu traha duro pa yega eyan. Di dos punto ta cu nan lo kier traha pa kita diferente retraso den diferente tereno cu tin di haber cu mucha y hoben. “E ta un reto hopi halto riba tereno di retraso, pero nos ta bezig cu nan”, Hernandez a sigura.

Hernandez a afirma cu na Aruba, 40% di mucha den scolnan secundario no ta haya e diploma secundario y p’esey un di cuater hoben no ta hayando trabou actualmente.

Asina mes, Hernandez a señalá cu e 60% no tin experiencia cu trabou y nan mester di un ayudo. Na augustus el a informa cu lo cuminsa cu di tres grupo di mama hoben soltero, unda 19 di e hobenan aki lo subi riba mercado laboral despues di un guia di varios luna, di motivacion y enseñanza pa empleo, yuda nan cu subsidio pa nan haya un crèche pa nan yiu, y asina nan por bay nan trabou.

Di su parti, Jermin Bell, trahado social miembro di Bureau Sostenemi, a manifesta cu dia 16 di mei pasa na un Consejo di Minister a aproba e meldpunt oficial di Aruba Bureau Sostenemi. Desde dia 1 di juni di e aña aki, nan ta trahando a base di articulo 243A den Codigo Civil, unda

e tarea di Bureau Sostenemi ta wordo defini, y un di nan tarea ta pa sostene e proceso pa yega na un codigo di siguridad.

“Ta importante pa yega na un codigo di, pa motibo cu cualkier organisacion cu ta traha directamente of indirectamente cu un menor mester sa e pasonan cu tin cu tuma

ora e profesional tin un preocupacion tocante e siguridad di un menor”, Bell a señalá.

Ora e ta papia di pasonan, el a referi na kico e profesionalnan mester haci, na unda mester asisti pa conseho y tambe si mester involucra un departamento. Unabes cu e codigo di siguridad ta bin na vigor, Bell a expresa cu cual-

ier persona lo por acudi na un instancia y lo bay tin e mesun contesta tocante unda pa cana y kico pa haci si tin un preocupacion pa cu un menor.

Bell a splica cu e siman aki lo bay sinta cu e diferente organisacionnan pa dialoga y pa nan por yega na un entendimiento y asina por yega na un codigo di siguridad y cuminsa cu e proceso ey.

Tambe a sigura cu Aruba ta hayando sosten for di Unicef y Augeo Fundacion, cual ta e fundacion cu a yuda Hulanda mes pa yega na e meldpunt of meldcode cu awor lo yama ‘Codigo di Siguridad’.

Esaki ta un proceso cu hunto cu e cuater sector di departamento y gruponan profesional mester desaroya nan propio codigo pa asina por ta implementa. E codigo a desaroya te un cierto nivel, pero ainda no ta cla, e cuater sector mester wak kico nan mester drecha pa esey por bin na vigor.

Segun Hernandez a bisa: “Nos ta wak cierto cosnan den exterior cu ta indica cu nos mester bay haci algo den e caso aki”, e ta bay ta un trabou fuerte den e cuater sector ey. Di igual manera, nan a señalá cu e telefon 588-1010 di Bureau Sostenemi ta sigui como meldpunt nacional.

